

24. Oktober 2016

**Uunga siunnersuut: Kommunini suliassa qarfiit aaqqissuuteqqinneqarnerata allanngortinneqarneranik Inatsisartut inatsisaat nr. xx, xx,xxx 2016-imeersaq.**

(Naalakkersuisut Siulittaasuat)

Siumumiit imatut oqaaseqarigissavarput.

2009-imiit aallartittumik nunatsinni aaqqissuuseqqinnerit annersaattut taasariaqartoq pivooq. Tassa pisortat suliassa qarfiisa aaqqissuuneqarnerat aallartinneqarpoq nunatsinni kommuunit sisamaannangortinneqarlutik. Tamatuma nassataraa maannakkut allangortinniarneqartoq Qaasuitsup kommuunia pilersinneqarmat illoqarfiit arfineq pingasut nunaqarfiillu 31-it.

Kattussuunermi anguniagaq tassaavoq innuttaasut sullinneqarneranni pisariitsumik eqaannerusumillu saaffissaqarnissaat. Aamma minnerugitsumik pisortat suliassa qarfiisa namminersorlutik oqartussaniit kommuuninut nussorneqarnissaat. Taamatut iliornikkut innuttaasut sullinneqarnerat pisariinnerusoq sukkanerusoq anguniarneqarluni. Siunertaq tamanik isumalluarfigineqartoq anguneqarpat innuttaasut marloqiusamik sullinneqarnerat qaangerneqartussaagaluarluni.

Ilisimaneqartutut Qasuitsup kommuuniani kattunermi atukkat assigiissaagassat assigiinneqaat, tamannalu assut unammillernarsimavoq kommuuniusimasullu minnerusumik annerusumillu assigiissarinermi atugaat sullinneqarnerallu allanguuteqarpoq.

Tamanna allangorneq ilutigalugu allaffisornikkut qitiusoqarfiit inuttatigut pitsaasumik aallarternissamik siunertaqartumik inuttaqarnikkut nukittuujunissaat anguniarlugu immikoortorta qarfiit eqiterneqalerput, eqiterussinerulli kinguneranik aalajagiisarneq qitiusumiittoq nukittoriartortillugu nunap immikoortuini pisorta qarfiit sangiillisinneqarput piginnaatitaafik siornatigut annertunerusimagaluartoq millisinneqarmat. Saaffiginninneq sullinneqarnerlu innuttaasunik naammagineqanngilaq akissutisiassamik qitiusoqarfimmulluunniit innersuunneqartarneq naliginnaavallaalersimammat.

Innuttaasutut saaffiginninnermi aqqu tigeqqaartariaqakkat amerlavallaartut ungasippallaartullu naammagineerupput.

Siunertaasimavoq suliassaqarfinnik namminersorlutik oqartussaniit nussuisoqassoq. Aaqqissuusseqqinnissami isumalioqatigiisitap suliiaa malillugu akisussaaffinnik nussuineq 2009-p 2013-llu iluani ingerlanneqartussaagaluartoq pinngittoorpoq. Tassa naalackersuinikkut isumaqatigiisutaasut siunertaasorlu malinnagit naalackersuisut ingerlatsimmata.

Oqartussaaffiit inuiaqatigiit ingerlanneqarneranni oqimaannerpaatut taasariaqartut Kommuune-nut ingerlalluarnepaatut taaneqarsinnaangittut angisuut taamaallaat nuunneqarput.

Oqarsinnaagunarpugut motoori ajoreersoq allanik "aquttuliinnarneqarpoq". Tupinnangeqaarlu Kommuunit ilungersorlutik Isumaginninnikkut ingerlatsiniarsarimmata. Qujanaqaarli Isumaginninnermi Naalackersuisoq eqqummaarilluni ilungersorlunilu Kommuunit suleqatigalugit iluarsisariilippassuarnut ingerlatsiniartuarmat

Anigaasatigut kommunalbestyrelse-ip aqutsinermini akisussaasuseqartumik ingerlatsiniarluni pissaaffini naamassiniarlugu sipaarniuteqarnerit ingerlattarsimavai tamakkulu innuttaasut atugaasa ajorsinerannik aamma malitseqarput. Allatut oqaatigalugu, Qaasuitsup Kommuunianik pilersitsigaluarneq iluatsinnerpaajungilaq kommuunip angissusianut nammagassat annertuallaarnerat pissutaalluni, aallarteriarnermilu naalackersuisuusunik suleqateqarluarsinnaaneq killeqarmat.

Innuttaasut tamanna malugisimaqaat allanguinissamillu kissaateqarlutik. Qujanartumillu maannakut naalackersuisuutitaqartut isumaqatigiisutaanni takuneqarsinnaasutuut kommunip angivallaarnera innuttaasullu oqartussaaqaanerata nukittorsarneqarnissaanik siunertaqarneq suliniutigivaat pimoorullugulu sulissutigineqalermat aalajagiifiginissaanullu inatsisissamik saqqummiusisoqarluni. Tamanna Siumumiit iluarisimaaratsigu oqaatigissuarput.

Kommuunip qanoq aggorneqarnissaa pingaarnernani suliassaqarfinnik kivitsisinnaanerat innuttasullu qanimut sullinneqarnerata aaqqisuuseqqinnermi pitsaanerulernissaa qitiutinneqartariaqartoq Siumumiit isumaqarpugut, minnerugitsumillu, akisussaaffiit namminersorlutik oqartussaniit nussorneqartussat kivinneqarsinnaasariaqarput naalackersuinikkullu pimoorullugu siunertaasoq kommuunerujussuangortitsinermi anguniarneqartariaqarpoq inoqarfiit mikinerusut qanimut oqartussaaqataanerat uterteqqinniarlugu.

Minnerunngittumillu innuttaasut najukkaminni piginneqataasutut misigisimajunnaarsimanerat allanngortittariaqarmat.

Maanna Qaasuitsup Kommuuniata avinneqarnissaanik siunnersuut aamma kommuunit sinnerinut inoqarfinni mikinerusuni ajornartorsiutit atuuttut assigimmatigit nalilersueqqittoqartariaqarneranut periarfissatut isigisariaqarpoq. Taamaattumillu aaqissuuseqqinerit oqartussaaqataanerup utertinnissaanik siunertaqartumik suliniutitut isigisariaqartoq Siumumiik isumaqarpugut.

Erseqqissassallugu pingaaruteqarpoq kommuunit kattunissaat maannakutullu sisamaannagortinneqarsimanerat naalackersuinikkut inatsisartuni aalajagigaammat, aamma anigaasartuuteqarnerusoqarsinnaanera aallaqaataaniilli ilisimaneqarmat. Tamannali kommuunit kattunermi anigaasartuuteqarnertik namminneerlutik akilersimammassuk erseqqissasallungu pingaaruteqarpoq. Eqqaamaneqassoormi kattussuunermi nunap karsiata akiligaa tassatuaasimammatt ikaarsaariarnermi ataatsimiititaliaasimasunut aningaasartuutit.

Allanguiniarneq manna pineqartoq anigaasartuuteqarfiunerussasoq naatsorsuutigineqarpoq, tamannalu inatsisartutigoortumik akileeqataafigineqartariaqartoq Siumut isumaqarpoq. Qaasuitsup Kommuuniata marlunnut avinneqarnissaa inatsisissatut siunersuutaavoq. Maanilu isumaqatigiinniarnikkut tamanna aalajagiunneqassanersoq isumaqatigiiniutissaavoq.

Siumup anigaasanut inatsisissamut siullermeerineri ujartugaasa ilangivaat namminersorlutik oqartussat akisussaafii kommuuninut nussorneqartussat qanoq tulleriaarlugillu takorloorneqarnersut. Naalackersuisunit isumaliutigineqarsimanersut pilersaarusiorgillu ilaatigut eqiterussilluni ullumikkutut aaqqissuussineq iluarineqanngereersoq eqqarsaatigalungu pigaaruteqartutut isigigatsigu. Aaqqisuuseqqinnermi alloriarnissaq pilersaarusiorneqartariaqarmat kommuunit aggornilersugaaneranni inuttussuseq aallaavigalugu pigaaruteqartututaaq isigigatsigu.

Kommuuniulersussani ilaasortaasut qassinik ilaasortaqaarnissaat aamma isumaliutigineqartariaqartoq Siumumiit isumaqarpungut. Assersuutigalugu kommuuni marlunnut avinneqassaguni ilaasortat 17-nik aamma 15-inik amerlassuseqarnissaat isumaliutissatut ilaatikkusupparput. Aammalu ilangullugu najukkani illoqarfinni qanimut innuttaasut tikillugit sullissisussatut atuusinnaanersut nalilersuineri ilaasariaqartoq Siumumiit oqaatigerusupparput.

Najukkani aqutsisut illoqarfinni aqutsisunik taagutsigit siulittaasulerlugit piginnaatitaafilerlungillu aalajagiisinnaanermut kommuunalbestyrelse-miit sinaakusersorneqarsimasunik annertuumik siuariaataassasoq najukkamilu oqartussaaqataanerup uterteqqinissaanik pilersitseqataassasoq Siumumiit eqqarsaatigeqqarput.

Inatsisissami isummerfissaq upernaakkut 2017-imi qinersinermi qinigaasut ikarsaariarnermi ataatsimiititaliatut atuunnissaat inassutigineqartutut isumaqatigaarput, taamatullu kommunalbestyrelse-ip maannakkut atuuttup ukiup naanissaanut 2017-imi atuunnissaa ilangullungu isumaqatigaarput.

Kommuuni avinneqaraluarpalluuniit isumaqatigiisutigalugu suliaasaqarfiit ataatsimoorunneqarsinnaasut ilangullutik kommunalbestyrelsemut ikaarsaariarnermullu ataatsimiititaliamut qinerneqartusamat piginnaatitsissutaasariartut ilangullugit kaamattuutigaarput.

Taamaaliornikkut ataatsimoorunneqarsinnaasut suleqatigiisutigalungit isumaqatigiisutaanissaat periarfissaqaqqullugu.

Taamatuttaaq Siumumi isumaqarpugut kommuunit naligiiginerat nalimmassarneqartariaqartoq akileraarutitigut kommuunit akunneranni nikiqassutip annertuallaarnera pissutigalugu. Taamaamat oqallinnerup matuma ilagisaanik qilanaarluta utaqqissuarput nalimmassaariaatsip allaanerusup saqqummiukkumaarneqarnissaanut.

Siumut-mi akisussaaqataavungut ullumikkutuut kommuunit sisamaannangortinneqarsimanerint. Akisussaaqataarusuppugullu qanimut oqartussaaqataanerup amingaatigineqalersimasup ujartorneqartullu nalilersoqqinneqarnissaanut. Piareersimavugullu Qaasuitsup Kommuuneata marlunnut pingasunulluuniit aggulunnissaanut oqalliseqataanissamat isumaqatigiisutigineqarsinnaasoq nasariniarlugu.

Siumumiit inoqarfiit minnerusut allat aamma nalunaarusiornikkut misissuiffiunissaat pigaartutut isigaarput oqartussaaqataaneq qulakkeerumallugu naalakkersuisunullu kaamattuutigaarput kommuunini allani aamma misissorneqartariaqartoq nakkutigeqqullugu tamanut naamaginartumik aqii-soqarnissaa aamma siunissami.

Naggattatigut ilanngullugu Naalakkersuisut siulittaasuat Siumumiit qutsavigissuarput aasaq manna Qaasuitsup Kommuoneani susassaqtut annertuumik peqatigalugit Kommuunip angissusaa pillugu innuttaasunik ataatsimiitseqattaarnermini qulequtaatilluarsimammagu. Taamaalilluni innuttaasut qanoq isumaqarnerat paasilluarsimammagu.

Taamatut oqaaseqarluta ataatsimiititaliamut aapassaaneerisoqartinnagu innersuupparput, qilanaarpugullu oqalliseqataanissatsinnut.

Jess Svane

Siumut